



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

**Hasina dang Bangladesh PM menden  
yutsütsü akhanger; nisung 24 süogo**

**Olympics: Axelsen makokba sülen  
Sen bronze atema asayatsü**



VOL. XXI ISSUE NO. 293 (ADOK 293) DIMAPUR TENTONÜ (MONDAY) LUROI (AUGUST) 05, 2024 ₹ 5.00

## Ao Senden-i NSCN-K (Khango) aitsür

Dimapur, August 4, 2024 (TYO): NSCN-K (Khango)-i M/s. KKB kibur K Rulho nem tasüba temerenshi agütsüba aser Nagaland kübok tanga district tem nung AYO kübok contractor temi mapa inyakba anentsü tetuyuba agütsüba meyipa agütsüla ta Ao Senden-i ashi.

Nagaland nung tesüngjem mapang ka nung tensa raksatsüsa nisung shingaiia tashi mamshitsüla. Yimjung atema teimla yur aliba mapang ka nung mangatettep madokdaksütsüla ta Ao Senden-isa ashi.

## NSDMA-i Tuensang nung relief camp lapok

Dimapur, August 4, 2024 (TYO): Tuensang district kübok Phinjang sector aser NST ward nung anentsüh aluba aser ali anenoka aliba ajanga kibong 200 dak kongshio.

Sorkari lapokba relief camps nung nisungtem jenokba dang masü saka chiyungtsü aser medical teyari balala agütsür. Pei pei ward lennirtemi den külemi ketdangsurtemi relief operations inyakdar aser NSDMA o DDMA, Tuensang ajanga teraksa bentsür aruba asadangba den teyari balala agütsür, ta Lhouchalie Viya-isa ashi.

## National Highway 202 shibanger



Dimapur, August 4, 2024 (TYO): Tuensang Deputy Commissioner Lithrongla Tongpi Rutsa, NCS-i National Highway NH 202 shibangba osang metetdaksüogo.

Zunheboto-Kohima lenmang ajanga senzütsü aser Mokokchung-i aertemi Tuensang-Yangli-Suruhotongsa mesüra Tuensang-Longleng-Changtongya-Mokokchung lenmangtem ajanga senzütsü akok ta DC-isa ashi.

## Assam nung sorkar mapa atema 'domicile policy' yanglutsü Tamangba yimsü balala tsüngda ali ayokba alenbanger

Guwahati, August 4, 2024 (Agencies): Assam nung asortemi dang sorkar mapa inyaksü atema domicile policy tasen ka sayatsü ta Chief Minister Himanta Biswa Sarma-i tanü ashi.

"Tesüiba nung talenba kecha melii inter-religion land transfers inyakogö. Hindu nungeri Muslim nunger dang ali alizük aser Muslim nungeri Hindu nunger dang nungi ali alizük. Sorkari ali alizükba mesüra yokdokba noktangtsü makok, ajisüaka Hindu nunger ali Muslim nunger aser Muslim nunger ali Hindu nunger ali alizüksü atema Chief Minister dang nungi temelaba nungdaksü" ta CM Sarma-isa ashi.

ayoktsü makok" ta pai ashi. "Assam nung 'love jihad' inyakertem taküm piyong tepuokdak ayutsü" ta CM Sarma-isa metetdaksü.

## Manipur nungi AR battalion 2 Jammu & Kashmir-i belener

Guwahati, August 4, 2024 (Agencies): Manipur nungi Assam Rifles (AR) battalion ana Jammu and Kashmir-i belener.



"Assam Rifles küm aika yangi alir. Parnok Kuki nunger den tesentaktep tajung lir. Parnoki Kuki kiralongrartem pusemer. Parnoki (AR) kodanga tiyongtsü nung meinyaker, iba jagi onoki parnok agiendaksünür. AR-i Kuki nunger tesentaktep yur inyakba kuli aika onok ket nung lir. Centre-i Manipur nung alirtem atema bilemstüba atema pelar. Iba ya onok atema takok ka lir" ta Thokchom-isa ashi.

Kukungeri aitsür; Meitei nunger takok ama züngshir Manipur kübok Bishnupur aser Kangpokpi district tem mapa lemezüka aliba Assam Rifles battalion ana belenba atema Kuki nungeri aitsür saka Meitei nungeribo parnok takok anguba ama züngshiba metetdaksüogo.

inyaker ta tesüiba nung COCOMI-i shia liasü. Ajisüaka, Manipur nung Kuki nunger Kuki MLA 10-i Meitei nunger peladaksütsü atema Assam Rifles belener ta aitsür. Iba lemtet atema parnok lungkak aitogo aser Prime Minister Narendra Modi dangi shiditem züluogo.

"Centre sorkari tebur mapa inyaksüla. Kin telungpur telok ka len aniba Chief Minister-i ashiba ama meinyaksüla. Centre-i iba ya inyakra tensa tamajungba ajurutsü" ta MLA Paolienlal Haokip-isa ashi.

# Delhi Ao Senso Telongjem-i Tsüngremmong benjong ayongzük



Delhi Ao Senso Telongjem-i Tsüngremmong benjong ayongzük amungdang tanurtemi yartsüngsangba noksa angur.

**Dimapur, Luroi/August 04 (TYO):** Pei tasoli nungi pilar süaka temelenshi aliba tensa mapang ka nung sobaliba wazüka ayutsü nükjidong nung Delhi Ao Senso Telongjem (DAST) ajanga August 3, 2024 nü Tsüngremmong munga liasü.

Akhi tetsü-tebou benjongmung sayutsü aser lanu putu nem angazükdaktsütsü

mechi zünga ajunga nungi iba benjong nung shilem agia liasü.

Iba benjongmung sentong ya Aor tanurtem aser anükabang chirtem ajanga ajanzüktsüsa renema liasü.

Iba benjongmung nung taintem arr atsütepa, sobaliba tsüngsang aser ken tena akhi yimya nung chiyongtsü chia-ajem aser akhi yimya nung inyaksangshiba nem mapang

tali agütsütsü mechi iba sentong nung sempet-tsüpet kecha mamshi aser o jembir balaka mejaok.

Iba Tsüngremmong benjong ya Wazirabad nung aliba Nagaland Armed Police Camp nung munga liasü aser Nagaland Armed Police nungi tantsü-tambo temi anepalua Naga nung chiyongtsü chia-jema sentong tembang.

# Zubza nung Skill Development sentong tembangogo

**Dimapur, Luroi/August 4 (TYO):** Department of Employment, Skill Development & Entrepreneurship (ESD&E), Kohima-i ayongzük, yimtsüng nung aliba tetsürtem atema skill development sentong ka ayongzük katsüba shibangba sentong August 2 nü Council Hall, Zubza, Kohima nung agiogo.

ESD&E Joint Director, ZubemoTsanglao-i, training centre tem Kohima aser Dimapur nung amenoka lir saka aika training agitsü atema item tesemtemi moteter ta ashi. Anungji yimtsüngtem nung training balala ayongzük katsüba ajanga sorkari nüburtem timba nem tajangzük agütsür ta paisa shisem.

Pai ashiba agi, mezüngbo training ya construction, plumbing, aser wiring amala nung dang agüja liasü. Ajisüaka tangbo tailoring nunga training agütsüdar, koba tetsürtem

ajanzükdaktsütsü atema lir, ta pai shisem.

Iba training sentong nung tetsürtemi kanga jangrabangra shilem agiba atema pai parnok nem tenüngsang agütsüba den sorkari agütsüba tailoring kits tem tajangzük kaa amshitsü ajungshia liasü. "Item osettem ya training nung shilem agirtem taküm liyonga aotsü atema ajanzükdaktsütsü, lokti nongita yaritsü aser parnok sempettem lanurtem nem belenzüka toktsütsü nükjidong nung agütsüba lir," ta pai ashi.

Tsanglao-i, yimtsüngtem den tesendaktep tajung ayutsü, tasa balala angazükbatem koda benoka inyaksangshir aser iba ajanga rongsenketzüng nung koda tajangzük angur aji asadanga atatsü department sentong lir ta metetdaktsü.

Pai ashiba agi, department-i asadanga sülen ngutetbatem sorkar dangi abentsü aser sentong koda takok ngua

inyakyonga aoer iba dak ajemdaker tarutsü nung teyari talila agütsütsü aser sentong atsülangshitsü takoktsü lir.

Sentong nungsa training agütsürtemi parnok tebilemba lemsatepba sentong ka agi, shirnoki tangar nem tangazükba agütsütsü aser parnok tajangshibatem lemsateptsü, tetsürtem tali arantetshitsütsü, tangardak memetaloki alitsü aser parnok nem tashi tali agütsütsü atema iba maongka agütsüba atema kanga pelaba lemsatep. Maneni training nung shilem agir katia tanga trainees tem tenüng nung la tajangshiba lemsatep aser maongka tajung agütsüba atema department dang kanga pelaba lemsatep.

Sentong tatemi training nung shilem agir ajak nem kuli kaket aser toolkits agüja liasü. Iba sentong ya Sechü Zubza Chairman, Khriengulie Kuotsu-i tepela o jembir tembang liasü.

# 'Gift a Radio Campaign' tembangogo



**Dimapur, Luroi/August 04 (TYO):** Office of the Zonal Head (Co), Akashvani, North East Zone, Guwahati ajanga North East India tesem ajunga nung ita tepiyong atema 'Gift a Radio Campaign' tenzüka July 31, 2024 nü tembangogo.

Iba dak sendakba nung Akashvani Kohima ajanga campaign tembangba sentong ka Akashvani Kohima office nung ayongzük liasü.

North East India nung 1948 küm July ita radio station mezüngbuba lapokba bilemteta iba sentong ya ayongzük liasü.

'Gift a Radio Campaign' yagi

nüburtemi shilem balala agia tetsüngta nung apu alaba aser regional heritage wazüka ayuba nung radio ajanga tongtipang shilem agiba angatetdakja liasü.

Ita tepiyong iba campaign mapang Nagaland nung lenla balala nungi nüngtugo aser tejanga nisung temi radio angur dang pei anasa alir aser meima alir aser nüngdakbapur nem radio set sempet ama agütsütsü ayongzük liasü.

Iba campaign tembangba sentong nunga tepela temaitsü sayua Akashvani Kohima ajanga radio angur teshimtet

nisung kar nem radio sets agüja liasü.

Sempet ama radio sets agütsüba ajanga region nung kibongi otsü aser ola balala aitaaktsütsü asoshi bendanga agütsütsü asendenshiba sayua liasü.

Akashvani Kohima ajanga iba campaign nung shilem agir, teyariteper aser nüburtem dang kanga pelar aser maneni osangtsüsang, education, entertainment atema sapang ka ama radio tashi amshia nüburtem ajungmesotsü temulungtetba nung lir, ta sangdong ka ajanga ashi.

# DIPR ajanga metongshitsür

**Dimapur, Luroi/August 04 (TYO):** Department adokba Government Calendar nung August 12, 2024 ya aibelenba sentsü temerem nung inoka lir, ta Department of Information & Public Relations

ajanga sangdong ka nung ashi. Ibai printing mapang aibelenba lir aser public holiday ama mezüngshitsüla. Iba ya ajanga nüburtem mangmanga lira Department-i tatok meshir, ta sangdong ajanga ashi.

# Nüburtem metsüboi lungjemernokdaktsüla:AKM

**Dimapur, Luroi/August 04 (TYO):** Tang ozüng alema senotsü saruba aser NSCN/GPRN (Khango) ajanga nisung takum agitsü amokmerenba aitsür, ta Ao Kaketshir Mungdang (AKM) sangdong ka ajanga ashi.

Iba amala inyaksangshi yagi tzüzüng-ozüng raksatsüba kisüng masü saka state nung nüburtem mulungjang nung tetsübo aitaaktsür, ta ashi.

Non-state actor temi temelaba makai saru meshiba aser agiba ya teti ozüng aser asen linük indang constitution tamendak dak aibelenba lir.

Ajidang masü state nung terenlok tsütsü dangar memenepeba kuli tulutibaji iba ya ka lir, ta AKM ajanga ashi.

Tax balala meshiba ajanga rongsenketzüng nung timtem agütsüba ya ajaki angateta lir, aser iba ya ajanga kija aser business inyaker nem senotsü tsütsü tebilemtsü tulu agütsür, ta ashi.

Item ozüng alema inyaksangshiba anendakja tzüzüng-ozüng tanaben amshitsü atema state ketdangsur temi tekeraba nung mera agitsü ajungshir, ta AKM sangdong ajanga ashi.

Mokokchung district kübok taxation kecha memelatsü aser

kija mesüra telok nem terenlok mapa nung timtem magütsüdaktsütsü, ta AKM ajanga nenshia ashi.

Ano item telok ajanga nisung takum nem timtem agütsüba ya khenyongi magizüker. Senso ajak aziüdokshi mesüra dangari amokbangtsü tetsübo makai alitsü temeden lir. Anungji ozüng amshir temi nüburtem kumzüka ayuba nung temulung tali agütsütsü aser timtem agütsür nem ochi obendang agütsütsü ayongzük, ta ashi.

Iba ama ozüng alema akhangba anema nüburtem aser lokti tentet balala lungjemernokdaktsü aser region nung yimjung tesunep, rongsenketzüng aintsü asoshi yariteptsü ayongzük, ta sangdong ajanga ashi.

Asen state nung iba temenen anema nokdakba nung AKM-a Angami Youth Organization (AYO) den dena lir aser state nung lokti tentet balala aser ochi angatetna nisung ajak adenshir iba temenen anema nokdaktsü ayongzük, ta AKM-i ashi.

KKB Contracor K Rulho timtemba AKM-i angateter aser justice, security aser rule of law tamendak dak wazüka ayutsü tangatetba nung akang-akanga nokdaka lir, ta AKM ajangasa ashi.

# AR temi sentong balala ayongzük



**Dimapur, Luroi/August 04 (TYO):** Assam Rifles temi August 4, 2024 nü Don Bosco School, Tesiphenyu nung National Friendship Day munga liasü.

Saisaponger yimya tajung ajungkettsü aser kaketshirtem tsüngta tesendaktep tajung adokdaktsütsü nükjidong nung iba sentong ya ayongzük, kong school nem volleyball, volleyball net, football, carrom boards, badminton sets, shuttle cock aser chess board amala lema agütsü.

Kasa anogo parnoki tongtipang sentong ka ayongzükbaji 'friendship bands' mesütsüba ya liasü. Iba sentong nung Assam Rifles den kaketshir 350 aser tesayur 15 dena liasü.

School tenüng nung Don Bosco School Tesiphenyu indang Father ajanga Assam Rifles dang pelaba lemsatepa

Maneni Assam Rifles temi Jawahar Navodaya Vidyalaya, Pftusero nung kaketshir aser tesayurtem den National Friendship Day munga liasü.

Ibai sentong nung shilem agirtem tsüngta tamang kateptsü, akumtsüboteptsü aser Assam Rifles aser nüburtem tsüngta tesendaktep tali akangshitsü nükjidong nung iba sentong ya ayongzük liasü.

Iba anogo Assam Rifles aser kaketshirtem tsüngta teka nung 'friendship band' inoktsütepa liasü aser iba sülen kaketshirtem nem süngo jemdaktsü.

Kasa sentong nung jara tuluka amenoka yangji kaketshir temi Assam Rifles tem dang pelaba o zülutepa liasü.

Iba 'Friendship Wall' ya tebour tajung jara ka akum, kong kaketshir temi temulung nung kongshitsüsa o tajung züluba den noksa yanglua liasü.



August 04, 2024 nü Wayanad district nung Kalpetta Range forest sepaitemi anentsüh lendong atalokba tesem nungi kümzükba tanurtem ajunger aliba noksa nung angur. Wayanad anentsüh lendong nung nisung 300 dak tema süogo.

### Tir Droupadi Murmu-i linük asem semdangtsü atema apusoa ogo

New Delhi, Luroi/August 04 (Agencies): India Tir, Droupadi Murmu-i Fiji, New Zealand aser Timor-Leste linüktem semdangtsü atema Amongnü Delhi nungi apusoa ogo. August 5 nü Tiri mezüing Fiji semdangtsü. Fiji Tir, Ratu Wiliame Maivalili Katonivere-i jaokba nung ajemdaker lai Fiji semdangter. India nunger Tir kati mezüing Fiji semdangbaji la asütsü. Lai Fiji Tir Katonivere aser Ato kilonser Sitiveni Rabuka na den senden amentsü. Laisa Fijian

Parliament nung o jembitsü aser Fiji nung alir India nungertem ajurutsü. August 07-09 anogotem nung lai New Zealand semdangtsü. Governor General, Dame Cindy Kiro-i jaokba nung ajemdaker lai New Zealand semdangtsü. Lai Governor General Kiro aser Ato kilonser Christopher Luxon na den senden amentsü. Laisa education conference ka nung jembitsü aser yangji aliba India nunger ajurutsü. Tatemsa Murmu-i August

10 nü Democratic Republic of Timor-Leste semdangtsü. Lai Tir José Ramos-Horta aser Ato kilonser Kay Rala "Xanana" Gusmão na den senden amentsü. Iba linük nungjia lai India nunger ajurutsü. Tang mezüing India Tir kati Timor-Leste semdangter asütsü. India Tiri Fiji, New Zealand aser Timor-Leste linüktem semdangbaji ajanga item linüktem den tesendaktep junga aliba sayur. Iba ya India nunger Act East Policy den sendaktepa lir.

### Onoki Nitish Kumar aser Lalu Prasad na atsüingdoktsü: Prashant Kishor

New Delhi, August 04 (Agencies): Amongnü Prashant Kishor-i pa indang yimtenren party tasen 'Jan Suraj' sangdongba sülen pai, par party-i Bihar nung JDU tongti lenir Nitish Kumar aser RJD tongti lenir, Lalu Prasad Yadav na atsüingdoktsü, ta metetdaksü. Prashant Kishor ya India nung yimtenren tsütsü asalentong yanglur mongin ka lir. Kishor-i pa indang party tasenba 'Jan Suraj' ji October 2 nü Mahatma Gandhi asoba anogomong nung semzüksü, ta metetdaksü. Amongnü Kishor-i, Bihar nung nisung crore 1 longjemtsü aser pei chirnurtem tarutsü tia atema telemtetba agitsü, ta metetdaksü. Kishor-i, "Prashant Kishor-i

October 2 nü yimtenren party ka tenteter masü. Nisung crore 1 longjemtsü aser parnok chirnurtem tarutsü tia atema telemtetba agia Nitish aser Lalu na atsüingdoktsü. Tamalenbo ni party balala aser lenirtemi election nung takok angutsü atema parnok yaria aruogo, party tentetba aser nüboyimba nung ni tangar yaria aruogo. Tangbo ni Bihar nungertem atema tebilemba onüktem lemsateptsü," ta metetdaksü. Prashant Kishor ya political consultancy IPAC tentetsang lir. 2014 kum Lok Sabha election nung pai BJP atema election asalentong yangluja liasü aser BJP-i takok tulu anguba ajanga pa kanga nungtugu aküm. Iba dak alia 2015 kum Bihar assembly election nung pai Nitish Kumar-a yaria liasü.

Kumar-i pa nübo agi temelung kanga süa 2018 kum pa JD(U) nung anioka liasü, ajisüaka kum ana dang lirbo pa JD(U) nungi jendok. 2021 kum West Bengal assembly election agiba sülenbo Kishor-i political consultancy nungi anen. Kishor-i, "Taruba ita ana tsüingda Jan Suraj office ketdangpur lakh 1.5-i 'Sansthapak Sadasyas' nung shilem agirtem den shisa lemsateptsü aser party atema tongtibang onüktem lateta party temzüing renemtsü. Tatemsa party nung lenir shimtsü," ta metetdaksa liasü. Paisa, "Ni nangzüka aliba ama party nung ni menden ka danga magitsü aser maneni taruba ita aika outreach mapa inyaksü," ta metetdaksü.



Ramanagara district., August 04, 2024: Amongnü Karnataka BJP Tir, B.Y. Vijayendra leniba nung BJP aser JD(S) züingsemtemi Bengaluru nungi Mysuru tashi longkak aita jajadang tangokba noksa nung angur. Mysuru Urban Development Authority site lemzüksüba nung ochimashi lir ta tai tonglokja parnoki longkak aiter.

## Himachal Pradesh nung tzümetsüing ajanga sen cr. 700 takoksa nguogo

Shimla, Luroi/August 04 (Agencies): Tzüinglu maneni aruba aser tzümetsüing ajanga Himachal Pradesh state nung sen crore 700 shi jenjang takoksa nguogo, ta Amongnü chief minister Sukhvinder Singh Sukhu-i metetdaksü. Paisa, tzümetsüing dak sendakba lendong nung asürtem tasü mang kar ngutetogo aser tang tashi samaba nisung 55 bo menguteter, ta metetdaksü. Chief minister Sukhvinder Singh Sukhu-i, taküm June 27 anogo nungi tenzüka tang tashi nung tzümetsüing ajanga kiojen raksatsüba ajanga sen crore 700 dak tema takoksa nguogo, ta ashi.

lapoktsü aser raksaa aliba aputem yanglutsü atema arisanga inyakdar. "Onok atema tongtibangtiba mapaji NDRF, SDRF aser state police den yaritepa kümzükba maparen inyaksü asoshi lir," ta shia pai Centre sorkar danga tekaraba nung teyari agütsüdaktsüner, ta mepishia metetdaksü. "Centre sorkari teyari agütsütsü ta onoki amanger. Iba mapang ya yimtenren tsütsü politics asayatsü mapang ka masü saka longjemer onok state nung lendong ajanga kongshirtem yaritsü mapang ka lir," ta Vikramaditya Singh-i metetdaksü.

"State-i sen crore 700 shi jenjang takoksa nguogo aser nisung 55 samar mangur. Tasü mang karbo ngutetdago. Onoki arisanga teyari agütsüba maparen inyakdar. Onoki Tsüingrem dang Himachal Pradesh state dang taochi sayuang ta sarasademer. Onoki iba tensa mita repringdar," ta Amongnü pai Shimla nung osangbenertem nem metetdaksü.

Amongnü anepdang züingia nungi tenzüka samaba nisungtem bushi tenzükogo. Himachal Pradesh director general of Police, Atul Verma-i, samaba nisung ajak mangu tashi onoki inyaksü, ta metetdaksü. Rampur SDM, Nishant Tomar-i, tang tashi nung yimtsüing pezü den tesendaktep lenmangtem meyanglu aser khenpiga amshitsü asoshi apu ka yangluogo, ta metetdaksü. Tzümetsüing agi kongshiba nüburtem nem chiyungtsü agütsüdar aser nüburtem dang ayong anasa maotsü tekümdangtsü metetdaksüogo, ta paisa metetdaksü.

Anepdang deputy chief minister aser PWD minister, Vikramaditya Singh-i tzümetsüing agi kongshiba tesemtem semdanga tensa asadangogo. Item tesem nung gari lenmang 193 tanaben



Independence Day atongtsü joko mapang ana nung lia August 4, 2024 nü Jammu yimti tezülen tetsürtemi linük waro arrba noksa nung angur.

### 2029 kum nunga INDIA teloktep Opposition nung alitsü: Amit Shah

New Delhi, August 04 (Agencies): Amongnü Union Home Minister Amit Shah-i Nyay Setu water project tenzüksü aser Chandigarh nung smart city mapatong tenzüksüogo. Iba sentong nung jembidang Amit Shah-i, 2029 kum nunga opposition INDIA teloktepi opposition menden nungsa amentsü atema renema alitsüla, ta ashi. Paisa Ato kilonser Narendra Modi tenüing sanga, taruba Lok Sabha election nunga NDA-i takok angutsü, ta metetdaksü. "INDIA teloktepi 2029 kum nunga opposition menden nung amentsü. Opposition-i kechi komaka merangyonga Modi-i aniba NDA-i takok angutsü. Congress-i election asem nung anguba menden dang nungi BJP-i tan election kija nung menden teimba ngutetogo, ta opposition-i mangateter," ta Shah-i metetdaksü.

Opposition maneni aija pai, "Sorkar tashi meitdaksütsü merangertemi, sorkar mapang talangka malitsü aser chireptsü ta jembir. Ni parnok dang ya shiner- sorkar kümsük tembanga aliba dang masü saka taruba sorkara NDA-isa akümtsü. Tarutsü nunga opposition nungsa alitsü atema parnok renema alitsüla aser opposition shilem tajungtiba nung agitsü atema angazüksüla," ta ashi. "Nyay Setu ya ali tasazük acre 125 nung yanglu. Modi-i Ato kilonser ka ama smart cities yangertsü atema nendaka inyaker aser item yimitem rongnung Chandigarh tejaklen lir. Ajak senteper sen crore lakh 1 indokogo. Onoki linük nung kibong shilem 74 nem tzü tajemtzü tajung agütsüteter aser ibaji ajanga tzü ajanga belenshiba tashidak balala ajema kümdaksüogo," ta paisa metetdaksü.



## TIR YIMYIM YIMOBILEM (EDITORIAL)

DIMAPUR TENTONÜ, AUGUST (LUROI) 05, 2024

### Cease Fire aliba tajangzük !

**N**aga nunger yimten nüchiso bushir teloktem o India sepaitem na tsungda mekhatepsü asoshi "Cease Fire" asütsü lemtet. Ceasefire tetezü mekhatepsü, anungji parnok tsungda mekhatepi yimjung nung alibaji nübortem asoshi tajangzük tuluka lir, kechiyong iba yagi Nagaland nung nübortem rongnung tetsübu tuluka samatsüogo. Ajsüaka, nübortemi memeteti Ceasefire tajangzük agirtem rongnung tongtijibo Cease Fire Monitoring Group aser Cease Fire Supervisory Board nung mendenbuba asütsü. Tsükchir kümer khatepa aliba telok ana tsungda khatepba anendaktsür yimjung nung lidaktsütsüsa anogo shia repranga anepalutsüba mapatema masü, anungji iba mapatema India government-i senotsü aika endoka nungdakba ajak CFMG/CFSB nem agüja alitsü. Ajsüaka, Cease Fire yanglua yur iba tajangzükji agia Nagaland nung Naga yimten nüchiso bushir telok teimba-teimba kümdakja mapang endoka Cease Fire repranga office lapoka yur kazübjibo Naga nungertemi imlaba aser aginüba tajangzük masü. Atangji, injang yoka mekhateker asünungji Naga nunger o India sepai na tsungdabo yimjung nung lir ta shitetsü, ajsüaka Nagaland nung contractor aser business inyakertem shisaboluba agi amui moutet pei kidanga tsübuseta alitsüsa Cease Fire nung alir teloktemi sen meshia amokmerenra, ibajibo Cease Fire maliba tensa dang nungi tamajungba lir. Ano, iba tensa dang nungi kanga agia tamajungtibaji Naga nunger teloktemi Nagaland nung terenlok mapatema inyaker contractor taküm samatsütsü tashi amokmerener saka Cease Fire reprangangibo tangua mangur aser tangashia mangashir amato ola koka madoki alibajibo shitakba Cease Fire repranga anepalurbo masü saka Naga nunger Cease Fire anguba tenung nung angati tajangzük agia amonger dang asütsü. Aji oda, Naga nunger lokti tentetemi ola madok tashibo nisung dak lendong tulu atalokyonga Case Fire anepalusangbo zak a masü tesünep nung ajemajema litetra, ibajibo Naga nunger yimjung nung lidaktsünüba tangatetba nung Cease Fire tajangzük agir nisung kabo masü. Aji oda, Nagaland nung Naga nunger yimten teloktemi Cease Fire terenemba aser ozüng anema inyakaka, aji nisung kari Cease Fire anepalusang dang tonga oagi meshira paibo mangashi aser mangu akümstüba tim masü, ajibo tzu menendaktsür anogo apuba ama, Naga nunger timtem aliba ajanga tajangzük agia kazür dang asütsü. Atangji, tangbo menur asüyonga Cease Fire anepalusangi olabo adokogo saka iba olaji shisabolua alirtem mulung süngzüksüsa masü. Aji oda, nisungtem tetsübu nung alidang mekümzükta government süli, Cease Fire reprangertem süli, parnokjibo nübortem asoshi inyaker masü saka nübortem nem mesüdaktsürtem dang asütsü. Telok kati nisung ka taküm agitsü amokmerener aser government-i inyakba terenlok mapatema meinyaktetsüsa nokdang, saka state government-i kecha mashir aser Cease Fire reprangang tongtibaia shingia pa dang tonga aruagi mashiba agi marakzür, ta sürabang parnok ajak pei pei Naga nunger tenung nung tajangzük angudakji tajangzük agia toktsür, Naga nunger nübortembo pei ki aser pei state toktsür ajentsüsa akümstü. Tanü asen kidang Manipur len Imphal nungbo telongpur asü, public asü mesüra police-ar mebendangtet, yimti yimdong nung prangpong apur senzüteper aser government-i repranga lia nübortem o nübortem na khatepdaktsür. Ibaji mesüka Nagaland nunga atalokdagi. Joko, government-i ozüng raksartem anema kecha meshitetba agi aser Cease Fire reprangertemia ozüng raksaba anema ola madoki tonga arua ashisa ataba agi, nübortemi parnok dak temulung melemtet kümer, yimti yimdong nung prangpong bener senzütsü tenzükogo. Aji oda, public ajungai prangpong apur telok telok kümer yimti yimdong ajaklen police melena anük tenzük nungbo, iba state-ji kechi state-a ta ashitsü ? Memenui asen lima yamaji küma aotsü. Idangjibo, Nagaland police aser India nunger sepaitemi repranga lia Naga nunger o Naga nunger na khatepsü. Iba anogo atalokdaktsütsü ataba agi Cease Fire anepalusang mendenbubai ola madok aremer asü ? Mesüra, iba ama tensa ka arua alibaji manguba agi state government nung alirtembo shisamebulur ?

## OLEMSABANG

### MOATSÜ ASER TSÜNGREM-MONG (INDANG KAKET NUNG ZÜLUA YÜTSÜBA SAMANIR-TEM)

~ A M Toshi Jamir, Retired Director, Lengrijan, Dimapur

#### (Yashi adok nungi...)

Item kaket züluba dak alaka, ano MOATSÜ aser TSÜNGREM-MONG indang ocet mapang shia Tir Yimyim aser Ao Milen nung züluba ngua arudagi. 1988 kum sulen adokba, ajangshia aruba ishika adoktsur.

MOATSÜ INDANG OCET ZÜLURTEM (meteta aliba tashi):

(i). MOATSÜ: THE SPRING FESTIVAL OF AOs, 1988 May, by Monalisa Changkija Longkumer; (ii) MOATSÜMONG, 27.4.2002 by N. Talitemjen Jamir; (iii) MOATSÜ TERATET, 30.4.2002, by I. Shilu Yaden; (iv) MOATSÜMONG, 1.5.2006, by N. Talitemjen Jamir; (v) Ao Kin Moatsü aser Tsüngremmong Ratet, 1.7.2007, by N. Talitemjen Jamir; (vi) MOATSÜMONG TERA ASER MOATSÜ TONGSHI RATET, 30.4.2009 by P. Temjen, Hindi Nagar, Padumpukhuri; (vii) MOATSÜ FESTIVAL, 1.5.2013 by Yangerlemba, former VP, People's college, Mokokchung; (viii). BENJONG BENTSÜ, 8.9.2018, by I. Shilu Yaden; (ix) BENJONGMUNG NUNG TEMELNSHI (EDITORIAL, TIR YIMYIM, 4.5.2023; (x) TIR YIMYIM ADOK 4.5.2023 BENJONGMONG TEMELNSHI INDANG YIMOZÜLURI ZÜLUBA YIMOBILEM ATEMA SASAR, 28.5.2023 by Temsü Jamir, Landmark Colony, Dimapur; (xi) AOR MOATSÜ, 7.6.2023, by P. Renthly Jamir. (xii) MOATSÜ ASER TSÜNGREMMONG BENJONG YA WAZÜKA AYÜTSÜLA, 4.6.2023 by L. KIKAPONGENER.

**TSÜNGREM MONG INDANG OCET ZÜLURTEM (meteta aliba tashi):**

(i) TSÜNGREMMONG, 5.8.2003, by N. Talitemjen Jamir; (ii) TSÜNGREMMONG, 1.8.2006, by N. Talitemjen Jamir; (iii) TSÜNGREMMONG RATET, 31.7.2006, by Nungshizenba Longkumer; (iv) AO KIN MOATSÜ ASER TSÜNGREMMONG RATET, 1.5.2007 by N. Talitemjen Jamir; (v) TSÜNGREMMONG, 31.7.2013, by M. Piyongtemjen Jamir; (vi) AOR TSÜNGREMMONG RATET (JILIA ZÜLUTSÜR), 20.7.2014, by Piyongtemjen, Dimapur; (vii) TSÜNGREMMUNG THE HARVEST FESTIVAL OF THE AOs, 22.7.2016, by Tourism Committee, Longsa, Mokokchung; (viii) TSÜNGREMMONG RATET, 1.8.2018, by Kiremwati Longchar; (ix) TSÜNGREMMONG, 1.8.2020, by I. Shilu Jamir; (x) TSÜNGREM MONG, 1-3/8/2024, by I. Shilu Jamir, Dimapur; (xi) TSÜNGREMMUNG SALEM O ABENER by Ao Students Conference, HQs: Mokokchung.

MOATSÜ ASER TSÜNGREM-MONG AMONGBA SÜLEN ASENOKI BILEMDANGTSÜ KHAR::

- (1) TSÜNGREM MONG mesüra TSÜNGREM MUNG (O mesüra U) amshitsü ibaji lateta ayutsula. Talisa Kaketshir-tem atema ibaya nungdak.
- (2) Nungdakba purtemi yak-yakta reprangtsü asoshi Moatsü aser Tsüngrem-mong indang tabensa ket-ta aliba kaket tila ka (a complete informative booklet /brochure with photos for ready reference) asenoki adoktet-tsü asü masü ?
- (3) Moatsü anogo 6 (terok-nü) aser Tsüngrem-mong anogo 3 (asem-nü) amongtsü asoshi British Sarkari (S.D.O-Civil, Mokokchung), 1946 kum agütsüba kaket/shity-ji (Order) rizünga ayutsü kanga nungdak ta bushiteter.

**Note-** MAYIMJEMI AIBELEN KHAR ZÜLUSEMA LIRA (INADVERTENT MISTAKES) MELENSHIA AZÜNGTSÜ MEPISHIR.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# China nung Arogo ka nung putir ka kum 5 tepuokdak ayutsü



Putir Zhang Chunlei, pa kinüngtsü Yang Aiqing, Jiang Rong aser Pastor Wang Yi nunger tangokba noksa nung angur.

**August 04, 2024:** China nung Guizhou Province yimtiba, Guiyang nung aliba court kati House Church ka nung putir, Zhang Chunlei kum pongu tepuokdak ayutsü obendang agütsüogo; pai sorkar tashi alema inyak aser ashikülak mapa inyak, ta pa nem tai tongloksü.

July 24 nü Guiyang Intermediate People's Court-i Guiyang Ren'ai Reformed Church nung putir, Zhang anema obendang agüja liasü; pa ya temesen dak sendakba tashidak ka agi timtemer, ta UK nung amenoka aliba melungtet telok Christian Solidarity Worldwide (CSW)-i metetdaksü.

2021 kum March ita nung Zhang-i police station kati oa par Arogo nung züngsem 10 kong lir ta police dang asüngdangba sülen mezüng pa pua liasü.

Ki ka nung Arogo asentenshi sentong ka agidang police-i mita ao aser Arogo nung züngsem ter puer oa liasü. Parnok puer aoba sülen osang kecha maliba agi Zhang-i ibaji metetpelatsü atema police station-i 2021 kum March ita nung ao. Ita ana lir sülen May 1 nü police-i pa apu. Iba mapang nungji pai

ashikülek mapa inyak ta pa nem tai tongloksü liasü. Maneni 2022 kum nung pa anema ken o tasen ka benok. Pai sorkar tashi alema inyak, ta pa nem tai tongloksü.

"Iba mapang nungjagi tenzüka pa maneni tepuokdak ayur. Pa temesen dak sendakba timtem tamajungba dang akümba mapang ka nung court-i pa aija ano kum pongu tepuokdak ayutsü obendang agütsüogo," ta CSW-isa metetdaksü.

Pa kinüngtsü Yang-i, "Zhang jail nung puokba mapang nungbo pa temang anema dang liasü. Ajisüaka pa tepuokdak aliba mapang temesen tamajungba akum aser yakum August ita nung hospital nung among. Pa anogo 20 dak tali mozü kidang amongba mapang nung pa dak temesen nung 'cirrhosis' puteta liasü," ta metetdaksü.

Pa temang tamajungba akümyonga tanaben jail nung puok, ta Yang-i metetdaksü.

Taoba hopta Guiyang Intermediate People's Court-i, linük tashi alema inyakba atema Zhang kum asem ser ita trok jail nung puoktsü aser ashikülakba atema kum ana tali jail nung puoktsü, ta obendang agütsüogo.

Iba obendang nungji pa tang tashi nung jail nung puokba mapang-a züngoktsü, anungji pa 2026 kum March 16 jail nungi chioksü.

Court-isa ashikülakba dak sendakba ozüng kübok senchi yuan sen 14,400 aser senchi tali yuan sen 5,000 yuan achi.

CSW-i ashiba agi, court nung ken o anadanga mapang nung Zhang kinüngtsü, Yang Aiqing dang court takdang telungi aittsü melaa liasü.

CSW tentetsang, Mervyn Thomas-i, "Kuli kecha makai putir Zhang Chunlei aitsüogo. Tesüiba kum asem tashi pa tepuokdak ayubaji tim masü. Iba dak alia ano mapang tali jail nung puoktsü obendang agütsübaji tim masü," ta metetdaksü.

Thomas-isa China ketdangsertem dang tangsa Zhang chioksüla aser tim masüba nung Zhang aser par kibong timtemdaksüba atema par kibong nem senotsü temenok agütsütsüla, ta ashi.

China Tir, Xi Jinping yimsüsüba kübok linük nung Protestant Arogotem ajak sorkari melaba Three-Self Church nung register sädaksütsü nükjidong nung inyaker.

# Muslim tsür kati Khrista agizükba agi tebei la mejungi yirutsü

**August 04, 2024:** Uganda linük nung arrshi kum 19 Muslim tsür kati Khristan yimsü agizükba agi tebei tejashi nung la kanga mejungi yirutsüogo.

July 15, 2024 nü Butaleja District kübok Nampologoma nungi Naasike Maliyati-i Mbale district kübok Lwangoli nung lar otsüla sendangba mapang nung lai evangelistic crusade ka nung aden.

Iba sentong nungji lai Khristan yimsü agizüktsü melungteta liasü.

Osangbener den jembidang Maliyati-i, "Parnoki lokti dang Khrista agizüktsü atema tayongzükba agütsüba mapang nung ni-a tejakleni ao aser Yisüji

kü Kibur aser Kümtetdakba, ta agizüktsü atema ni sarasadema liasü. Ni tanaben kidangi shilangdangbo ozü aianui kübu dang ni Islam toktsür Khristan yimsü dangi meyipogo, ta metetdaksür liasü," ta ashi.

"Iba hopta tatembanglen Amongnü ni tekülem sentong nung denner arudangbo kübu, Abdulrahim Kutosi den ozü kinüngertemi tejashi nung ni ataa liasü," ta Maliyati-i ashi.

"Parnoki ni lisü agi alenba sülen kü dak azük. Tatemsa kübui 'iron' tatsük den tzü tatsük kü dak shiloktsü. 'Ozü kibong atema la ya tenüngmenük' ta küboi ayimdena liasü," ta lai ashi. Maliyati ya Mbale district

nung aliba Noor Islamic Institute nung azünger.

Iba sülen tebei la dang na joko Tenla kidangi maotsü, ta tuyu aser kinüngertemi la motorbike ka nung anir aoba sülen Namatala ayong anasa toktsür aru.

Süisüponger Khristan, Nicolas Ndoooli-i la kumzuka liasü. Nicolas-i, "Nisung kari teyari meshia 'Yisu, Yisu, Yisu' ta ayimdena ola ni angashi. Khristan ka asünung ni motorbke anenba sülen la clinic kati anir ao," ta ashi.

Nicolas Ndoooli-isa medical treatment atema la nem Uganda nunger sen 30,000 agütsü.

# ANOGO ABEN TSÜNGREM DEN

## Tsüngremi mulungba ; asen mapang amshiba

Anitet 20:8-11

Aser Pai parnok dang ashi, "Nenok azüngmeyakdaki pilaa arung, aser kenpika anisüngzükang kechiaser aika oli aruli ta liasü, aser parnok chiyongtsüa mapang maka. Mark 6:31.

Management company kati nisung arishi kum 75 nung mapang indokba yamai lemsa- mejangba mapang kum 23; mapa inyakba mapang, kum 19; asayaba mapang, kum 9; ainlen jajaba kum 6; chiyongba kum 6; line nung ataba kum 5; ki merük mejuba kum 4; chiyongtsü renemba kum 3; telephone nung jembiba kum 2; oset jaka shidak nung meyui bushiba kum 1; shiti aruba lapokba, ita 8; amenba, ita 6; tekülem ita 6; aser sarasadem nung anogo 19.

Asen Kibubai asenok asoshi anisüngzük aser Pa tenüng sanga anisüngzuka Pa den mapang indoktsü asoshi anogo ka balaka shitetta ayu. Khristai sarasademtsü aser anisüngzüktsü asoshi mapang balaka agi. Asenoki mapangji koma amshir reprangdangang. Sarasadem temtsünglen aser Lai bushiba keni mali. Mapang mali ta asenoki nemnemer. Tongtipang mapa masüba asoshi asenoki mapang agütsür. Asenoki Khrista inyakyimji anidakra, asenoki sarasademtsü aser Lai bushitsü mapang agitetta yutet.

Ajak dang alia, kodang asenoki Kümtetdakba den tejak o tejak na chitepa ajurutepdir, asenoki sarasadem aser Lai bushiba nung mapang indoktsü.

Temeim Khrista, Ne den onoki mapang indoktsü yariang. Amen.

# Rwanda nung sorkari Tenla ki 4,000 shibangtsüogo



**August 04, 2024:** Rwanda saka tang mezüng linük nung aliba Pentecostal Arogotem nung sayutsüngirtemi sayatenya mapa inyakteter ta peisasa jembiba ya kanga bulua kumogo.

Iba ama mapang ka nung tesüiba ita kija nung Rwanda nung Tenla ki 4,000 dak tema shibangtsüogo. Ketdangsertemi tuyuba health & safety temzüng nung ajemdaker Tenla kitem shibangtsü. Talisa Tenla kitem nung loud speakers amshiba agi nisungtem nem temang nung timtem agütsür, ta ketdangsertemi metetdaksü.

Osangbener den jembidang Minister of Local Government, Jean Claude Musabyimana-i, "Iba ya nisungtem sarasademba nokdangtsü asoshi masü saka tekülemertem temang anema alitsü atema lir," ta metetdaksü.

Rwanda nung tekülem kitem kanga renlokba azüoktsü nükjidong nung kum pongu tejaklen ozüng ka agizuka liasü

saka tang mezüng ketdangsertemi Tenla kitem aser mosques sashia mita aoe. Iba ozüng kübok tekülem kitem nung sound system tulu amshitsü memelar aser Arogo tenzüksü tebilemba alirtemi tamasa theological training agitsü tuyur.

2018 kum mezüng iba ozüng agizükba sülen Tenla ki 700 shibangja liasü.

Iba mapang nungji Rwanda Tir, Paul Kagame-i, linük nung tekülem ki aika menüngdakger; terenlok aliba linüktem nung dang tekülem ki aika asütsü temsüa lir, ta metetdakja liasü.

Tawa Arogotem mita aoba ya local urban ketdangsertem aser Rwanda Governance Board (RGB) nati senteper inyaker.

Tang tashi nung tekülem ki ajak senteper 4,223 shibangtsüogo aser iba nungjagi tekülem ki 427 bo lungkitem nung yangluba liasü.

Rwanda nung nütsüng teimbaka Khristantem lir.

### AO OSHI ANGAZÜKDAK: TANÜ ANGAZÜKTSÜBA OJANG



Talak

(n) tatemlen ( last end)

\* Süngdong talak nung ozü atemer.

Talaktsü

(adj) maginüi mesüra mechinüi aküm (get fed up)

\* Shi temo ya talaktsü chiyongtsü ka lir.

### OLONG PAITEP # 6866

1		2		3		4	5		
				6					7
		8							
9				10		11			
			12					13	
						14			
16						17			

#### TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S\_\_\_ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

#### LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

### OLONG PAITEP # 6865 TELANGZÜBA


#### TIPIEN :

- 1. Tanga, 6. Wara, 7. Rajang,
- 9. Anük, 10. Jenjang, 11. Alar,
- 14. Ngashi, 15. Nala,
- 16. Mechi.

#### LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer,
- 9. Anema, 10. Jabili,
- 11. Among, 12. Miim,
- 13. Anem.

### NAI-A YA METETTER MA



Egypt nung adventurer Rami Ali-i Guinness World Record tasen ka yanglutetogo aser ibaji "most underwater pull-ups in one breath" lir. Dahab nung Red Sea nung Ali-i tzü telungi metre 9 irr underwater pull-ups 33 sütet. Egypt nung Ministry of Youth and Sports-i ayongzüka Ali-i iba alima otsü tasen yanglutetogo.

## Manipur CM-i Internally Displaced Persons atema senden amen



**Imphal, August 4, 2024** (IDPs) atema liasü. Iba senden nung Superintendent of Police, District Commissioner aser tanga tongti ketdangsürtem aden aser pei talidak toktsür dak sendakba

khurettem lemsatep. Mangatettep ajanga pei talidak toktsür aoba IDPs ajanga timtem jenti ajurur aser parnok yaritsü atema iba senden nung tebilembatem lemsatep.

Tanü kin balala nungi lennirtemi Chief Minister Biren Singh den ajurutepe liasü.

Paominlen Haokip-i National Commission for Scheduled Tribes (NCST) dangi ken o ka benok saka iba nung kin balala lennirtem indang taila signature enokba ajanga ashishitep onük ka adok.

Tanü kin balala lennirtemi Chief Minister Biren Singh dang NCST ken o mali ama kümdaktsütsü ayongzüko. Parnokisa iba mapa aitsüba aser temeten meshiba metetdaksüogo.

## Tipra Motha MLA-i 'high power committee' tentettsü akhanger

**Agartala, August 4, 2024** (Agencies): Tipra Motha MLA Ranjit Debbarma-i Union Home Minister Amit Shah dang Tripura nung ozüng alema aruba noktangtsü atema 'High Power Committee' ka tentettsü mepishiogo.

aoba aser apuba mapa tajung inyaker. Parnoki ozüng alema arur den ozüng alema shibelenba aika puogo" ta pai ashi.

Tripura State Police (North Tripura District Police-Churaibari Police Station) ajanga Bangladeshi nunger 23 puogo, ta Debbarma-isa ashi.

Myanmar nungi Muslim Rohingya nunger Bangladesh sorkar teyari agia Bangladesh Territory nung camp dwellers ama lidaktsür. Parnok kar Bangladesh telung nung Cox's Bazar Balahali Rohingya Camp, Lambasia Rohingya Camp amala nung alir. Iba sülen Bangladeshi Rohingya Muslim nunger Tripura ajanga India telungi aiter, ta pai Amit Shah dang ashi.

"Tripura ya ozüng alema arurtem lenmang ama kümogo aser parnok India ajungalen prokshir aser linük atema lendong bentsür arutsüsa lir. Ozüng alema arurtemi inyakba mapa ya Indian National Security atema lendong lir" ta paisa ashi.

"Anungji Tripura nung High Power Committee (Administrative Secretary, Department of Home, Secretary Home Department, District Superintendent of Police, District Magistrate and Collector, State Level Nodal Officer) ka alitsü nüngdaker. Jammu & Kashmir nung ama HPC-i bendangertem jangjatsü aser parnok linüki meyipa yoktsü" ta Debbarma-isa ashi.

## TV reporter dak teka sangshiba atema police mapa nungi anentsü



**Imphal, August 4, 2024** (Agencies): Manipur police nung Sub-Inspector kati local TV reporter ka dak teka sangshiba sülen mapa nungi anentsüogo.

aitsüba sülen Imphal East District Superintendent of Police, K. Meghachandra Singh-i Honibarnü Nikhil Singh mapa nungi anentsüba metetdaksü.

mapa nungi anentsür aser Reserve Line, Porompat police station nung alitsü. Iba mapang pai subsistence allowance dang angutsü ta Imphal East District SP-isa metetdaksüogo.

Police ketdangsür Nikhil Singh-i Impact TV reporter Rameshchandra Mangang dak teka sangshiba video ka lir. Brihostibarnü Rameshchandra-i sentong ka nung adendang iba ya atalok.

Police Department ama disciplined force nung inyaker kati meinyaktsü mapa inyakogo ta Superintendent of Police-i sangdong agütsüba nung shia lir.

Iba tatalokba ya journalists aser civil society groups-i aitsür. All Manipur Working Journalist's Union and Editors' Guild Manipur-i iba ya aitsüogo aser police ketdangsür mapa nungi anentsütsü takhangba agütsüogo.

Iba tatalokba atema nübertemi ola adokba aser aser ibaji metembang tashi pa

## Pelaba Lemsateper



Aliemba Jamir (Süngratsü)  
Asü: 26-07-2024

Onoki teti meima aliba Obala, pa manemi aliba mapang nungi tasünü tashi nung shirnokisa ozü khuret ajak nung rongsen, nübu, shisatsü, sarasadem aser lenmang balala ajanga yaritepogo, nenok ajak dang kanga pelaba lemsateper.

Tsüngremi nenok ajak moajangma.

**Temeim Kinüngtsü, Chirnur, Semchirsepnur,  
Kinüngertem aser Anükapang**

## Crimea nung Russian submarine ka raksatsü: Ukraine

**Kyiv, Luroi/August 04 (Agencies):** Occupied Crimean peninsula nung rongnendak anena aliba Russian submarine ka amak aser raksatsüogo ta Ukraine mitkar temi ashir.

2014 küm sayaba kilo-class attack submarine, Rostov-on-Don ya Hokulbarnü rongnendak Sevastopol yimti nung lia missile kati amak aser tzü telungi alu, ta Ukraine indang general staff ajanga sangdong ka nung ashi.

Russia indang Black Sea fleet ajanga amshiba submarines pezü rongnung ibai ka ta ashir, koba ajanga Kalibr cruise missiles khaloktsüteter. Russian defence ministry nungi telangzüba kecha agüja mali.

Kyiv nung aliba ketdangsür temisa ashiba agi iba mapang peninsula kumzüka ayuba S-400 air defence systems pezü raksatsüogo. Crimean peninsula ya Russia-i 2014 küm ozüng alema rakzük.

Rostov-on-Don ya Sevastopol shipyard nung yanglushiba mapang missile kati kanga sashia raksatsü

südi, ta UK nung aliba itdangiter ketdangsür temi taoba küm September ita shia liasü.

Iba sülen Russia-i iba submarine ya yanglushi aser tawa Sevastopol anasa tendanga liasü, ta Ukraine mitkari ashir. Iba submarine ya sen million \$300 jenjang lir ta ashir.

“Rostov-on-Don ano maneni raksatsüba ajanga Ukrainian territorial waters, Black Sea nung Russian fleet atema tejenbudak maka ta kuli sayur,” ta Kyiv nung aliba general staff ajanga Honibarnü sangdong ka nung ashi.

March ita kisüng nunga iba rongnendak yimti, Sevastopol nung landing ships ana aser patrol vessel ana dak amak ta Ukraine-i ashir.

Russia-i kuli tejangja makai 2022 küm February ita nungi Ukraine amakdang tzüyim sepaitem aisü nung timtem ajurua lir. Ukraine-i Black Sea fleet indang flagship Moskva densema warships 15 shi raksatsüogo mesüra tzüyim telungi yokogo ta ashir.

Russia indang vessels dak tanen makai amakba mechi Black den sendaktepba Sea of Azov nungi tzüyim sepaitem ainshidaksüogo, ta Ukraine mitkari taoba hopta shia liasü.

Ukraine-i aircraft carrier anünga aliba tatemsaba Admiral Kuznetsov samatsütsü tasa yanglua aliba raksatsü, ta Russia indang internal security service, FSB ajanga tawa ashi. Iba rong ya 1985 küm semzük aser 2018 küm nungi yanglushia liasü.

Kasa mapang Kyiv nung aliba ketdangsür temi Ukrainian drones ajanga Russia nung airfield aser oil depots tulu aika amak ta ashir.

Ukraine-i Morozovsk airfield amak, kong guide bombs tem yua lir, koba ajanga tawa Ukraine yimti balala maka liasü.

Russia-i drones aika khazüka yok ta ashir, saka yangji aliba ketdangsür temi air base temeket nung state of emergency sangdonga liasü. Rostov, Kursk aser Belgorod region tem nunga totzü rizünga ayuba tesemtem maka liasü.

## OFFICE OF THE LONGSA CITIZEN CLUB

MOKOKCHUNG : NAGALAND 798601

### KHONANG TETUSHI AGÜTSÜR

Kr. Limasenla Longkumer, tebu Wb. Sosangrenba Longkumer, tetsü Wt. Imtjungla Jamir, tena jala-i Nagaland University kübok Under graduate tatitang 2024 nung Fazl Ali College Mokokchung nungi Geography honours nung topper jenjang nung takok anguba asoshi Citizen Club sanger-i la nem tenüngsang tetushi agütsür.

Tsüngremi ano la azüngba wadang nung maneni takok lidakjang ta onok sarasadem.

Sd/-  
Bendangnuksi Jamir  
President

Sd/-  
Limabenla Jamir  
Secretary

## Hasina dang Bangladesh PM menden yutsütsü akhanger; nisung 24 süogo

**Dhaka, Luroi/August 04 (Agencies):** Bangladesh nung Ato Kilonser Sheikh Hasina mapa nungi anenang ta khanga longkak aiter nisung meyrirjang aika senshidaksütsü mechi Deobarnü police temi tear gas khalokja stun grenades mereplokja rongrong adokba nung nisung 24 süogo aser aika yirur lir.

Iba mepetmesü ya ajanga sorkari internet services shibangtsüsa akum aser ibai January ita opposition party tongtiba Bangladesh National Party ajanga shilem magiba election nung Hasina-i kümsük pezü buba atonga takok ngur kanga sashia longkak aitba sülen tetendangba tulutiba alitsü.

Longkak aiter, police aser ruling party activists tsüngta raratepba mapang central Munsiganj district nung construction workers ana mapai aodak tepset aser nisung 30 yirua liasü.

“Parnok injang zübu keter tasü mozü kidangi bener aru,” ta iba district hospital nung superintendent Abu Hena Mohammad Jamal-i ashi. Police temi injang mamshi ta ashir, ajisüaka improvised explosives kar poka iba tesem ya rara tongpang amai akum ta ashi.

Iba South Asian linük nungya danga tesemtem nunga azüdokshia liasü, kong longkak

aiter temi tongtipang highways tem mokdang. Northeast tsütsü Pabna district nung longkak aiter aser Hasina'er rulung Awami League activists tsüngta raratepdang nisung asem asü aser 50 yiru, ta tenük kuli alirtemi ashi.

Northern tsütsü Bogura district nunga nisung ana tepset ta mozüki ketdangsür temi ashi. Kaketshir temi sorkar dang anentsü khanga non-co-operation tenzüker nisung telok kati linük yimtiba nung aliba Bangabandhu Sheikh Mujib Medical College Hospital maka raksatsü.

Sorkar mapa nung quota agütsüba anema taoba ita kaketshir temi anir longkak aitba mapang nisung 150 shi tepset, meyrirjang aika yiru aser 10,000 shi pua liasü. Supreme Court ajanga quotas timba agientsüba sülen longkak aitba ya anena liasü, saka asür kinunger nem obendang agüjang ta khanga kaketshirtem taoba hopta tesem kar nung longkak aita liasü.

Hasina'er sorkari tashiyim tali amshir ta la aitsür aser human rights telok temi tai tongloktsür, saka parnoki magizüker. Sorkari high-speed internet services aser mobile operators tem shibangtsü aser broadband connections nungia Facebook aser WhatsApp amala social media sapang mamshiteti liasü.

## US, UK & France lisopur dang Lebanon nungi ainshitsü tuyu

**Beirut, Luroi/August 4 (Agencies):** United States, United Kingdom aser France densema anüolen aliba linüktemi lispourtem dang tangsa tang Lebanon toktsür aotsü tetuyuba agütsüogo, kechiyong Hamas pur political tekolakba Ismail Haniyeh tepsetba sülen Middle East nung tensa mejungi kümer lir.

Haniyeh tepsetba ya Israel aser US na dak tai tongloktsüogo, ajisüaka Israel-i tang tashi nung telangzüba kecha agüja mali aser US-ia parnok iba inyakyim nung densema mali ta shiogo.

Israel-i Hezbollah indang military tekolakba Fuad Shukur Beirut nung tepsetba sülen ghonda ishika lir Bodhbarnü Haniyeh, Tehran nung tepseta liasü aser iba ajanga Iran aser

“axis of resistance” puri mang ayangtsü nangzükogo.


October ita Israel-i Gaza amak tenzükba sülen Lebanon nung amendaker aliba Hezbollah telok, shirnok Hamas den longjemer lir, parnok aser Israel nung sepaitem arrtsü nung rara arudar.

Lebanon, Yemen, Iraq aser Syria nung Iran-i teyari agütsüba teloktemi Gaza nung rara tenzükba sülen Israel maka arudar. Ajisüaka iba hopta Haniyeh aser Shukur na tepsetba ajanga tensa kanga mejungi kümdaksüogo.

Honibarnü US-i, parnoki warships aser fighter jets talila bener arutsü ta ashiba den Lebanon nung aliba lisopurtem dang iba linük toktsür aotsü tetuyuba agütsüogo.

(Maneni tapak 8 nung...)

## Olympics: Novak Djokovic-i tebur kija asaya kokogo



Luroi/August 4, 2024

(Agencies): Serbia nunger asayar Novak Djokovic-i Deobarnü Olympics tebur kija asaya final nung Spain nunger asayar Carlos Alcaraz 7-6(3) 7-6(2) agi koka gold medal nguogo.

Arishi kum 37 tain asayar yagi Court Philippe Chatrier nung final asaya kanga toktepa asayaba sülen tang mezüngbuba Olympics nung gold medal ka ngutetogo.

Djokovic ya tennis asayartem rongnung ajak dang takok tajungtiba anguba asayartem rongnung ka lir aser

pai tang tashi nung otsüsüsüsa Grand Slam 24 koka lir aser iba den pa tetsür aser tebur asayartem rongnungi No. 1 jenjang nung talangtiba aliba asayar lir. Pai 2008 kum Summer Olympics nung bronze medal ka ngur lir, saka aji pa asoshi teperi masü asü.

Djokovic-i tang tashi nung 2008 kum Beijing nung Rafael Nadal makok, 2012 kum London nung Andy Murray makok aser kum asem tejakdang Tokyo nung Alexander Zverev mekoki liasü.

Takum Paris nung pai Nadal

tanabuba round nung tsükdakja liasü. 1908 kum sülen Djokovic ya Olympics nung tebur kija asaya nung gold medal angurtem rongnung tambusang kumogo.

Tennis asaya nung Steffi Graf ya Grand Slam pezüprongla aser Olympic nung gold medal anguba mezüngbuba asayar akum. Lai iba otsü tasen ya 1988 kum yanglua liasü. Teburtem rongnung Andre Agassi-i mezüngbuba Grand Slam pezüprongla den Olympics nung gold medal ka ngua liasü.

Golden Slam angurtem rongnung Rafael Nadal ya tanobusang lir. Pai iba alizüng ya 2010 kum arishi kum 24 asüba mapang ajangzüküteta liasü. Serena Williams-ia 2012 kum Olympics nung gold medal anguba sülen Golden Slam ajangzükütetogo.

Tang Novak Djokovic-a Golden Slam ajangzükütetertem rongnung densenogogo.

## Olympics: Axelsen makokba sülen Sen bronze atema asayatsü

Luroi/August 4, 2024

(Agencies): Deobarnü Paris Olympics badminton tebur kija asaya nung Lakshya Sen, Olympic tesüsabuba koker alisang Viktor Axelsen-i straight set nung kokogo.

Arishi kum 22 tain Almora nungi asayar shibai 2021 kum World Championships nung bronze medal ka ngur lir, pa mezüngbuba game nungbo 7-0 agi tejakdang liasü saka pai iba maangka magiteti asaya 20-22, 14-21 agi mekoki liasü. Tena tsüngda semifinal asaya minute 54 asaya liasü.

“Ni atasa asaya-a tasa tanga kar benoka asayadang asübo jungla ta bilemer. Ajisüaka ni kechi koma asaya nung ajungtsü ta bilem ajak asayadangogo. Iba asaya nungi tangazüksü aika lir. Ni asüngbo renemer atatsü. Iba

asaya ajanga ni temelenshitsu kechisa ali aji angazüka asaya asoshi renemshitsüla. Asaya ka dang lir,” ta Sen-i asaya tembangba sülen ashi.

Semifinal nung tamakok anguba sülen Sen bronze medal atema Malaysia nunger asayar Lee Zii Jia den asayatsü lir. Pai iba asaya koka medal ka danga ngura pa India nunger teburtem rongnungi Olympics nung medal ka anguba mezüngbuba asayar akümsü.

Asaya dak sendakba nung Sen-i, “iba asaya nungi kechisa angazükogogo item ya bener bronze medal atema asaya nung takokba tashi tajungtiba asayatsü,” ta ashi.

India nunger asayartemi Olympics nung tang tashi nung badminton asaya nung gold medal ka danga ngua mali. PV Sindhu-i Rio aser Tokyo

Olympics nung silver aser bronze medal nguogo aser Saina Nehwal-i London Olympics nung bronze medal ka ngur lir.

Sen takum mezüngbuba Olympics nung asayar aser pai otsü tasen ka yanglua India nunger tebur asayartem rongnungi semifinal tonga asayaba mezüngbuba asayar akum. Pai quarterfinal nung Chinese Taipei nunger asayar Chou Tien Chen 19-21 21-15 21-12 agi koka iba otsü tasen yanglua liasü.

Pre-quarterfinal asaya nung pai külem India nunger asayar 21-12 21-6 agi koka quarter final-i ai aser pa Parupalli Kashyap aser Kidambi Srikanth na den India nunger tebur asayartem rongnungi Olympics nung quarterfinal tonga asayaba tasembuba asayar akum.

## Man City-i goal 4-2 agi Chelsea kokogo

Luroi/August 4, 2024

(Agencies): Columbus nung Manchester City aser Chelsea na pre-season asaya nung Erling Haaland hat-trick ka agütsüba sülen City-i iba asaya goal 4-2 agi kokogo.

Arishi kum 24 tain Haaland-i asaya tenzüker minute pongu tsüngda goal ana idakja liasü. Chelsea puri aibelenba ajanga asaya tenzükli City pur tejakdang kümdaktsü.

Asaya nung mezüngbuba goal ya Tosin Adarabioyo-i passing aibelenba agütsüba sülen Levi Colwill-i Haaland alangdaktsüba ajanga penalty ka agütsü koba Norway nunger asayar yagi aibelen mesüi idakja liasü.

Iba sülen mapang

tatsükadang lir Moises Caicedo-i pass junga magütsüba ka Haaland-i tom nung agizüka tanabuba goal idakja liasü.

Asaya tetenzüklen goal ana ayong ayonga dang idaktsüba sülen Pep Guardiola-i aniba team yagi asaya tanabuba shilem nung ano goal ka idakja liasü. Goal tasembuba ya substitute Raheem Sterling-i aibelenba ajanga Oscar Bobb-i minute 55buba nung idakja liasü.

Iba sülen minute ka dang lir ano Haaland-i par team asoshi pezübuba aser pa asoshi tasembuba goal idakja liasü. Iba goal ya-a Malo Gusto-i aibelenba ajanga idakja liasü.

Asaya nung Chelsea-ia goal ana idaktsü. Raheem Sterling-i minute 59buba nung goal ka

idaktsü aser Noni Madueke-i minute 88buba nung Chelsea atema tanabuba goal idakja liasü.

Aibelen aika menaka Maresca-i ashiba agi par team-i kanga junga asayaogogo. Asaya nung aibelen aika menaba ya pitch kanga takok asüba ajanga lir ta manager anapronglai shiogo.

City pur UK-i meyipa arutsü aser parnok taruba Honibarnü Manchester United den Community Shield asayatsü.

Kasa mapang nung Chelsea pur maneni United States nung mongzüksü aser parnok Mongolbar aonung Real Madrid den asayatsü aser taruba Deobarnü Stamford Bridge nung Inter Milan den asayatsü.

## PDTA-i Nagaland Taekwondo Championship ayongzüksü

Kohima, Luroi/August 04 (TYO): Phek District Taekwondo Association (PDTA) ajanga September 2-4, 2024 anogotem Phek Town nung Nagaland Taekwondo Championship 2024 ayongzüksü.

Iba sentong dak sendakba

nung committee balala tenteta maparen tenzükogogo, ta PDTA tir Nuyi Hoshi-i ashi.

Kasa mapang PDTA-i Phek Town nung aliba HoDs, CSOs aser nüburttem dang iba championship takok ngua agitettsü asoshi yariteptsü ayongzüküka liasü.

## BENDANGLI OSANG : Tapak 7 nungi...

### US, UK & France lisopur dang...

Beirut nung manendaker aliba US embassy-i lisopurtem dang parnoki Lebanon nung toktsür maotsü telemtetba agira tanga lenmang kar bushitsü aser mapang tatsüka atema jenoka atatsü atema renema atatsü asoshi jenjang agitsü shiogo.

UK indang Foreign Office-ia Lebanon nung aliba lisopurtem dang commercial tayimtsütem senzüa aliba mapang iba linük toktsür aotsü tetuyuba agütsüogogo.

“Tensa kanga mejungi küma odar,” ta British Foreign Secretary David Lammy-i ashi.

Deobarnü France Ministry for Europe & Foreign Affairs-ia senzüsenpongtsü atema tetuyuba ka agütsüogogo aser Lebanon nung aliba lisopurtem dang tensa tamajungba küma aor asünung Lebanon takokba tashi takaratiba nung toktsür aotsü tetuyuba agütsüogogo.

Kasa mapang nung Canada-ia lisopurtem dang Israel-i takok tashi maotsü tetuyuba agütsüogogo. “Tensa kecha tekümdangtsü magütsüi tamajungba küma aotsü ana nung lir,” ta Canada sorkari ashi.

Tensa mejungi akümba ajanga airline KLM, Lufthansa, Emirates, Air France, Turkish Airlines, Singapore Airlines aser Swiss Airlines amala tongtibang airlines temi Israel, Iran aser Lebanon nungeri tayimtsütem meyoker.

“Lebanon nunger aika immigrants tem lir aser kar summer vacations atema aruba lir, “ ta Al Jazeera osangbener Ali Hashem-i Beirut nungi ashi. “Tayimtsü aika thitsüdar aser tayimtsü senzüsenpong nung minprong adokba sülen nüburttem tekaratiba nung tensa tamajungba makümdang linük toktsür oner,” ta paisa ashi.

Paisa, Lebanon Ato

Kilonseri, parnok amakertem meyiper amaktsü parnok temeden lir ta shiatokogogo, ta ashi.

“Lebanon nung tang tir ka mali. Airport tem nung tetsükdaktsü adokba ama linük yimsüsüba nunga tetsükdaktsü adoker lir. Ibayongji sorkar ketdangsurtem aikati telangzüba agütsüba mangur,” ta osangbenerisa ashi.

Deobarnü southern Lebanon nungi Israel dak rocket 50 dak tema khaloktsüogogo. Item rocket tem nokdangtsü atema Israel-i missile defence system amenok aser Upper Galilee kübok tesem aika nung item rocket tem khadangba aser apokba nguogo.

Israel-i manger mesangwa tsüngda southern Lebanon nung tesem kar amakba sülen item rocket tem ya khalokja liasü, ta official Lebanese media sangdong ka ajanga Deobarnü metetdaktsü.

“Israel nunger indang rara dang amshiba tayimtsütemi Al Mahmudiyah anasa tesem kar amak aser iba sülen ano anüng ajanga Kafr Rumman anütoklen maka liasü,” ta Lebanese National News Agency-i metetdaktsü.

Iran-i Honibarnü ashiba agi, Hezbollah puri Israel nung military tamendakdaktem dang masü saka Israel teyongtsülen tesem balala amaktsü imlar.

Kasa mapang nung Israel-i, Gaza kübok Deir el-Balah nung Al-Aqsa Martyrs Hospital kima süki yanglur Palestine nungertem jenoka aliba tesem maka nisung asem tepset aser nisung 18 yirutsüogogo. Gaza City nung school ka tejenokdaki melener aliba maka nisung 17 tepsetba sülen ghonda ishika lir iba tesem ya maka liasü.

October ita nungi Israel-i Gaza amak tenzükba sülen Palestine nunger 39,550 shi tepsetogogo aser nisung 91,280 yirutsüogogo.

## BILEMDANGANG

“Temelenshi asoshi tejen yimyatem toktsütettsüla.”